

Sektor awam tarik minat Cina, India

Permohonan kaum Cina dan India untuk menyertai sektor awam yang berjaya mencatat peningkatan tertinggi dalam sejarah iaitu masing-masing 77 peratus dan 79 peratus bagi tempoh enam bulan terakhir tahun lalu membuktikan bahawa perkhidmatan awam negara semakin kompetitif dan menarik perhatian khalayak.

Menurut Pengerusi Suruhanjaya Perkhidmatan Awam (SPA) Tan Sri Mahmood Adam, sebanyak 11,848 permohonan diterima daripada kaum Cina dan 21,481 permohonan daripada kaum India, berbanding masing-masing hanya 6,697 dan 12,009 permohonan dalam tempoh sama tahun sebelumnya.

Katanya, peningkatan drastik ini hasil kerjasama SPA dengan persatuan, pertubuhan bukan kerajaan (NGO) dan individu mewakili kaum berkenaan selain dengan NGO kaum Dayak dan Kelantan sejak Jun lalu melalui siri jelajah SPA.

Sebanyak 47,335 lantikan baru daripada pelbagai kaum dilaksanakan tahun lalu juga sekali gus melenyapkan segala tuduhan dan fitnah selama ini bahawa sektor awam hanya dikuasai oleh kaum Melayu semata-mata.

Ia juga menidakkan tanggapan dan persepsi khalayak sekian lama bahawa kaum bukan Melayu tidak minat untuk berkhidmat dengan kerajaan atas pelbagai alasan yang tidak munasabah.

Sektor awam kompetitif

Bagi penulis, statistik dan senario ini menggambarkan betapa sektor awam kita semakin kompetitif dan melalui satu proses transformasi hebat dalam jangka masa sangat singkat sehingga mampu menarik minat seluruh rakyat Malaysia untuk memohon pelbagai jawatan.

Hal ini dibuktikan lagi dengan statistik 631,692 permohonan baru diterima antara Jun hingga Disember tahun lalu yang menunjukkan peningkatan 247,341 permohonan berbanding tempoh sama pada 2011 iaitu pertambahan 192,867 permohonan (63 peratus) bagi kaum Melayu dan 45,002 (77 peratus) bagi kaum lain.

Malah, calon mendaftar dengan SPA juga dilaporkan meningkat kepada 814,659 orang dengan tempoh sah laku pendaftaran itu selama lima tahun berbanding hanya setahun sebelum ini.

Skim gaji semakin menarik, peluang kenaikan pangkat lebih terbuka serta pelbagai inisiatif tam-

bahan baru terus menjadi daya penarik utama pelbagai lapisan masyarakat untuk memohon menyertai perkhidmatan awam.

Di samping itu, penulis percaya tahap kesedaran rakyat yang mampu memberi sumbangan bermakna kepada kemajuan negara dan masyarakat menjadi satu lagi sebab bilangan yang ingin berkhidmat dengan kerajaan naik mendadak terutama daripada bukan Melayu.

Gembleng tenaga

Ini menunjukkan semua pihak sedia menggembleng tenaga bagi memacu kecemerlangan negara dan rakyat, termasuk dalam mengejar impian untuk menjadi negara berpendapatan tinggi menjelang 2020 yang hanya berbaki tujuh tahun.

Kita wajar memuji segala usaha dan inisiatif dilaksanakan SPA untuk menarik perhatian bukan Melayu menyertai sektor awam selain berharap agar SPA terus mengkaji dan memperkembangkan pelbagai lagi inisiatif baru bagi memperkasakan lagi perkhidmatan awam supaya terus kekal kompetitif.

Diharapkan juga agar Suruhanjaya Khas Mengkaji Transformasi Perkhidmatan Awam (SKMTPA) yang ditubuhkan kerajaan untuk menambah baik kualiti perkhidmatan awam melalui penyampaian perkhidmatan berkesan kepada rakyat akan mengambil kira segala cadangan yang dikemukakan pelbagai pihak.

Sebagai jentera pentadbiran kerajaan, sektor awam dan penjawat awam perlu lebih agresif agar selari dengan tuntutan perubahan semasa. Untuk itu, sektor awam perlu memiliki penjawat yang kompetitif, mesra rakyat, efisien dan produktif.

Senario semasa juga menuntut penjawat awam dan jabatan kerajaan mengutamakan elemen inovasi dan kreativiti dalam menyampaikan perkhidmatan kepada rakyat.

Maka sektor awam perlu kekal kompetitif agar kita dapat menarik dan melantik calon yang benar-benar berkualiti dan berdaya saing.

Ia tidak mustahil untuk dilaksanakan kerana bilangan pemohon yang semakin meningkat, sekali gus membuka peluang yang luas kepada SPA menyaring dan memilih calon berkualiti.

Ringkasnya penawaran melebihi permintaan memberi SPA pilihan lebih fleksibel melantik calon baru.

Penulis berkelulusan Sarjana Komunikasi Korporat adalah Ketua Bahagian Perancangan Korporat UPM

FAKTA
SPA terima 11,848 permohonan daripada kaum Cina dan 21,481 (India)